

Uvodnik

Neka među vama jedna zajednica bude koja će dobru pozivati, čestitost i poštenje naređivati, a zlo zabranjivati! Eto, takvi su oni koji će uspjeti! (Kur'an, Imranova porodica, 104).

U ovom, 66. broju *Muallima* našim čitateljima donosimo niz tekstova o značajnim temama porodice i edukacije. Ovo je, na stranicama *Muallima*, nastavak aktualiziranja ovih tema jer smo se njima posvećivali i u ranijim brojevima. I s pravom smo to činili, jer se bosansko-hercegovačko društvo, porodica i sistem odgoja i obrazovanja unutar institucija Islamske zajednice svakodnevno suočavaju s novim složenim izazovima i zahtjevima, koji konstantno umanjuju napore i trud cijele jedne generacije roditelja, imama, i muallima. Vrijeme je redefiniranja. Naše današnje razumijevanje redefiniranja odgoja i obrazovanja na islamskim osnovama, te razumijevanja uloga ključnih aktera u ovom procesu (porodica, odgojno-obrazovne ustanove i kadrovi) određivat će stanje u institucijama u kojima se poziva i poučava dobru; određivat će buduće znanje i oblikovati razumijevanje islamskih vrijednosti. To je svakako proces, i u zbiru svih varijabli koji na njega mogu i trebaju utjecati kompliciran, dinamičan i zahtjevan. Izgradnja slobodnog, dobrog, i pravednog bosanskohercegovačkog društva, društva u kojem će se *dobru pozivati, čestitost i poštenje naređivati, a zlo zabranjivati* zajednički je cilj svih nas. Zbog tog cilja, vrijeme je za redefiniranje uloga i metoda, a odmah potom vrijeme za nužne promjene, koje će zahtijevati odgovornost, komunikaciju, nove relacije i prakse, odricanja i umijeća. Iz tekstova koje Vam donosimo, između ostalog, evidentno je da je redefiniranje uloga i odnosa uključenih u proces odgoja i obrazovanja potreba, te da su i organi Islamske zajednice u čijoj su institucionalnoj nadležnosti ova pitanja tu potrebu prepoznali i njom se bavili. Tako, u rubrici Forum donosimo, pored teksta Nezira Halilovića i tri teksta predstavljena na savjetovanju o mektepskoj nastavi pod nazivom *Mekteb – središte islamskog poučavanja, odgoja i upućivanja* u organizaciji Uprave za vjerske poslove Rijaseta IZ u BiH: Vahida Fazlovića, Alje Cikotića te tekst Enesa Svrake i Omera Kovačevića.

U rubrici Putokazi, akademik Enes Karić, prepoznatljivim stilom i metodom, nudeći uvide u kur'anski tekst, tradiciju Božijeg Poslanika te klasične komentare Kur'ana, raskriva značenja kur'anskog termina *ihsān* – dobročinstvo.

U rubrici Sagledavanja donosimo prijevod teksta pod nazivom *Je li ovo mračno doba muslimanskog svijeta?*, te tekstove Adisa Poljića i Ishaka Aleševića.

Vašoj pažnji preporučujemo intervju u kojem je Harun Karčić razgovarao sa Jonathanom Brownom, profesorom islamskih nauka pri Georgetown univerzitetu u Washingtonu, o pojavi mnoštva autoriteta u tumačenju primarnih izvora islamskog prava; o autoritetima u islamu, idžtihadu, hadisu, Šerijatu i savremenim izazovima s kojima se susreću muslimani danas.

U rubrici Muallim donosimo dva istraživanja, Mersihe Jusić i Anele Hasanagić o percepciji porodičnih odnosa i akademskom postignuću adolescenata te drugo, Midhata Čauševića, o statusnim problemima i poteškoćama jednoroditeljskih porodica u Bosni i Hercegovini.

O redefiniranju roditeljske uloge u svjetlu savremenih izazova (i islamske tradicije) čitajte u tekstu Nermine Baljević u rubrici Islamske teme. U istoj rubrici je i tekst Mustafe Hasanića o tretmanu braka i porodice kroz analizu pitanja i odgovora objavljenih na bosanskom jeziku u posljednjih dvadeset godina. Oba teksta predstavljena su na konferenciji *Muslimanska porodica – prava i dužnosti* koju je u Sarajevu organizirala Islamska zajednica u BiH i Rabita – Liga muslimanskog svijeta. U ovoj rubrici donosimo i tekst Mustafe Spahića o socijalnoj dimenziji posta.

U rubrici Pregled preporučujemo značajne prikaze knjiga: Fikreta Karčića o šerijatskoj sudačkoj školi koja je djelovala u Šumnu / Šumen na sjeveroistoku Bugarske te opsežan prikaz knjige Žrtve genocida na području *Vlasenice 1992–1995*, koji potpisuje Fikret Bećirović.

Senada Tahirović